

impetueux de la part dont ils viennent, comme Pline recite & Isidore en ses Etymologies, de ce que aussi l'experience m'a rendu plus certain, que l'autorité ou de Pline, ou autre des anciens. Sans eslongner de propos, aucuns ont escrit qu'il y a cinq especes de presage & prognostic des tempestes futures sus la mer, comme Polybius estant avecques Scipion Æmilian en Afrique. Au surplus y a abondance de moules fort grosses. Quant aux animaux terrestres, vous y en trouuerez vn grand nombre, & bestes fort sauuages & dangereuses, comme gros ours, lesquels presque tous sont blancs. Et ce que ie dy des bestes s'ested iusques aux oyseaux, desquels le plumage presque tire sur le blanc: ce que ie pese auenir pour l'excessiue froidur du pais. Lesquels ours iour & nuyt sont importus es cabanes des Sauuages, pour manger leurs huiles & poissons, quád il s'en trouue de reserue. Quát aux ours encore que nous en ayons amplemēt traité en nostre Cosmographie de Leuant, nous dirons toutefois en passant cōme les habitans du pais les prēnent affligez de l'importunité qu'ils leur font. Doncques ils font certaines fosses en terre fort profondes pres les arbres ou rochers, puis les couurent si finement de quelques branches ou fueillages d'arbres: & ce là ou quelque essain de mousches à miel se retire, ce que ces ours cherchent & suyuet diligemment, & en sont fort friands, non comme ie croy tant pour s'en rassasier, que pour s'en guerir les ieux qu'ils ont naturellement debiles, & tout le cerueau, mesmes qu'estás picquez de ces mousches redent quelque sang, specialemēt par la teste, qui leur apporte grad allegemēt. Il se voit là vne espece de bestes grandes cōme buffles, portans cornes assez larges, la peau

*Isidore.**Ani-
maux
estrages.*